

# 6

## SA DAU VUKEI AU NA YALO TABU

### IVAKAMACALA TAUMADA VEI QASENIVULI

Ni ko vakarautaki iko vakayalo mo vakatavulica na lesoni oqo, yalovinaka wilika ka vakasamataka na veika oqo: Na Yalo Tabu sa ikatolu ni Lewe Tolu Vakalou, vata kei na Tamada Vakalomalagi kei Jisu Karisito. O koya e yalo ka ibulibuli vakatamata (raica na V&V 130:22). Na ilesilesi ni Yalo Tabu o ya me vakadinadinataka na Tamana kei na Luvena kei na dina ni veika kecega (raica 3 Nifai 11:36; Moronai 10:5). Sa rawa talega me dusimaki keda me da digidigi dodonu ka dau veivakacegui vei keda (raica V&V 31:11). Na ivakarau ni nona dau vosa mai vei keda na Yalo Tabu e vakaraitaki tiko ena ivolanikalou o ya ena “dua na domo lailai e vinaka” (raica 1 Tui 19:11–12).

### VULI MAI NA ITAVIQARAVI

Tekivu ena dua na itaviqaravi ni veivakasoqoni. Me baleta na kena vakasama, raica na tabana e 3.

*Masu* Sureta e dua na gone me cabora na idola masu.

*Sere* Tukuna vei ira na gone ni ko sa na vakarau lagata e dua na sere me baleta na Tamada Vakalomalagi. Lagata se cavuta na qaqa ni sere “I Know My Father Lives” (*Children’s Songbook*, 5) ka matanataka na qaqana e ra. Sureti ira na gone me ra tomani iko.

Au kila ni bula tiko o Tamaqu ka lomani au talega. (*tara na lomaseremu*)

Sa tukuna vei au na Yalo Tabu na ka oqo ka tukuna ni sa ka dina, (*tara na daligamu me vaka o vakarorogo*)

Ka tukuna vei au ni sa ka dina.

*Tokaruataki ni iTaviqaravi* Sureti ira na gone me ra kaya “Yalotabu.” Tukuna vei ira ni dua tale na yaca ni Yalo ni Kalou o ya na Yalo Tabu. Sureti ira na gone me ra kaya “Yalo Tabu.” Vakamacalataka ni Yalo Tabu sa dau vukei keda me da kila ni sa lomani keda na Tamada Vakalomalagi.

*Vakatotomuri ni iVukivuki* Tukuna vei ira na gone ni gauna eda na cakava kina na veika sa dodonu, ena dau vukei keda na Yalo Tabu me da kila ni da sa vakayacora o ya e dua na digidigi dodonu. Sureti ira na gone me ra tomani iko ni ko sa vakatotonuria tiko na ivukivuki ni vakayacora na veika sa dodonu. Me kena ivakaraitaki:

Sa ka dodonu me da gole ki lotu. Me da vakatakarakarataka mada ni da sa lako tiko ki lotu (*me dodoki na liga ruarua ni tayabe wavoki*).

Me vakayacori talega ki na ivakaraitaki tale eso, me vakataka na kena veisolitaki e dua na iyaya ni vakatatalo, vukei Na ena quaraki ni vuloa, kei na so tale.

*iTalanoa* Vakamacalataka ni sa rawa ni dau vukei keda na Yalo Tabu ni da dau rere. Mo wasea na italanoa oqo:

Ena dua na siga e a liwa e dua na cava rerevaki ena taudaku ni vale nei Tevita. E a cekuvu e dua na kurukuru vakaitamera (*me ra ubia na daligadra o ira na gone*) kei na cagi kaukauwa (*me ra uwu me vaka na rorogo ni cagi o ira na gone*) vata kei na uca (*me ra vakatakarakarataka na gone e ligadra na tau ni uca*). Sa rere o Tevita. A tukuna vua o tinana ni gauna e rere kina me dau masu vei Tamada Vakalomalagi (*vakaraitaka na iyalyalo e tiko ena tabana e 30*). Erau sa masu o Tevita kei tinana me taqomaki rau na Tamada Vakalomalagi. Sa qai yalovakacegu ka marau kina o Tevita. A kaya o tinana ni o Tamada Vakalomalagi a tala mai na Yalo Tabu me vakatikora vua na yalovakacegu o ya me kakua kina ni rere.

Sureti ira na gone me ra kaya “Yalo Tabu.”



### IWALEWALE NI VEIVAKAVULICI

*Yalo Tabu:* Ni ra se lalai sara na gone, sa rawa vei ira me ra vulica ka kila na veivakauqeti ni Yalo Tabu. Ena gauna ni dua na lesoni, vukei ira me ra kila na yalo ni loloma kei na veikauwaitaki e dau lako mai vua na Yalo Tabu—vakabibi ni ra sa dau vulica tiko na veika e baleta na Tamada Vakalomalagi kei Jisu Karisito.

*Gone lalai sara:* Mo nanuma tiko ni vuqa vei ira na gone e dau dredre me ra vakarorogo vakabalavu. Vakaraici ira tiko ke ra gadreva e dua na veisau. Kevaka sa balavu mai na nodra dabe tiko, cakava e dua na itaviqaravi me ra yavala kina.

*iTinitini* Wasea na nomu ivakadinadina me baleta na Yalo Tabu. Sa rawa mo tukuna talega kina vakalekaleka e dua na gauna ko a dusimaki kina mai vua na Yalo Tabu.

*Masu* Sureta e dua na gone me cabora na isogo masu.

## NA ITAVIQARAVI ME DIGITAKI


*VAKAVAKARAU* *Me baleta na itaviqaravi ni ivolanikalou:* Vakarautaka mai na iVolatabu. Vakatakilakilataka toka na Joni 14:26 me rawarawa na nomu na cega. *Me baleta na itaviqaravi ni ivakaraitaki vakaiyaloyalo:* Lavetaka na iyaloyalo e tiko ena tabana e 31. *Me baleta na qito ni kiube (cube):* Lavetaka na iyaloyalo e tiko ena tabana e 31 ka rokataka ke gadrevi vakakina. Kotiva na tutuna kaukauwa ka lobika ena laini cacavukavuka, Tepitaka se dregata me caka kina e dua na kiube (cube).

*Malanivosa me Matanataki* Mo ni tucake wavoki kei ira na gone ka cavuqaqataka na malanivosa me matanataki ogo:  
Sa dau rogo malua ni dau vosa na Yalo Tabu. (*tabaka na gusumu ena dua ga na qaqalo*)  
E sega ni dau kaila, e ka dina o ya. (*dedeka wavoki na ligamu ruarua e gusumu me vaka o kaila tiko*)  
Ena vakalougatataki, vukei, ka dusimaki iko (*ni veitauri liga ka lako wavoki*)  
Ena veika kecega o cakava. (*dabe e ra*)

*iVolanikalou* Tukuna vei ira na gone ni sa vakavulica tu o Jisu ena ivolanikalou ni na dau vakavulici keda na Yalo Tabu. Cega na iVolatabu ki na Joni 14:26 ka wilika, “Na Yalo Tabu . . . ena vakavulici kemudou ena ka kecega.” Sureti ira na gone me ra cavuta vata kei iko na malanivosa o ya, me vica ga na vosa ena dua ga na gauna.

*iVakaraitaki Vakaiyaloyalo* Vakaraitaka na iyaloyalo e tiko ena tabana e 31 ka solia mera yadua na gone na ilavelave ni iyaloyalo o ya. Mo dusi ki na itaba ni vale ni Lotu ka vakamacalataka ni Yalo Tabu ena vukei keda me da kila ni gole ki na lotu sa ka dodonu me da cakava. Sureti ira na gone me ra dusia na vale ni Lotu e tiko ena nodra iyaloyalo. Me vakayacori vakakina ki na iyaloyalo tale eso.

*Qito ni Kiube (Cube)* Vaqiqica na kiube o sa cakava. Wilika na ivakamacala e tiko ena dela ni kiube, ka me ra cavuta vata kei iko o ira na gone. Me ra qai matanataka e dua na ivukivuki o ira na gone me salavata kei na iyaloyalo o ya. Ena gauna sa vuki mai kina na yasana e tiko kina na malanivosa “Sa Dau Vukei Au na Yalo Tabu,” tukuna vei ira na gone ni sa dau vukei keda na Yalo Tabu me da kila ni da sa cakava e dua na ka vinaka. Me vakayacori tale, ka solia na gauna me ra vaqiqica kece sara na gone yadua na kiube.



## IWALEWALE NI VEIVAKAVULICI


*Veika o sa sotava:* Na nomu talanoataka na veika eso o sa sotava ena rawa ni vukei ira ko vakatavulica tiko me ra raica rawa na sala e dau veivakauqeti kina na kosipeli ena nodra bula ena veisiga (raica na *Veituberi, Me iLutua Ni Noda Bula*, 51, 195). Me baleti ira na itabayabaki ogo, na nomu talanoataka na veika o sa sotava oti e dodonu me rawarawa tu ga ka lekaleka—me kakua ni sivia e dua se rua na iyatuvosa.

*iVolanikalou:* “Ena gauna o vakavulici ira kina na gone, e dodonu ga mo vakayagataka na ivolanikalou ena veigauna ka raica na sala eso me ra dau taleitaka na gone na vakayagataka na ivolanikalou” (*Veituberi, Me iLutua Ni Noda Bula*, 67). Sa rawa mo vukei ira me ra bucina e dua na yalo ni taleitaka na ivolanikalou ni se bera mada ga ni ra kila na wiliwili. Sa rawa mada ga mo wilika e dua na wase ni tikina kivei ira na gone, mo wilika na tikina taucoke ni ko vakavakarau tiko ki na lesoni.


*Na waraki ni nodra gauna yadua* e dau dredre vei ira na gone lalai. Kevaka e levu na iwiliwili ni gone ena nomu kalasi ni isususu, sa rawa mo vaqiqica ga o iko na kiube ka kakua ni solia vei ira na gone me ra vaqiqica.




Sa Dau Vukei Au  
na Yalo Tabu



Gole ki lotu




Masu



Mo dau loloma



Talairawarawa vei  
rau na itubutubu



Wilika na ivolanikalou